

四庫全書

集部

欽定四庫全書

粵西文載卷十七

桂林府通判汪森編

志

南蠻志

晉
范曄

禮記稱南方曰蠻雕題交趾其俗男女同川而浴故曰
交趾其西有噉人國生首子輒解而食之謂之宜弟味
旨則以遺其君君喜而賞其父取妻美則讓其兄今烏

許人是也交趾之南有越裳國周公居攝六年制禮作樂天下和平越裳以三象重譯而獻白雉曰道路悠遠山川阻深音使不通故重譯而朝成王以歸周公曰德不加焉則君子不饗其質政不施焉則君子不臣其人吾何以獲此賜也其使請曰吾受命吾國之黃耆曰久矣天之無烈風雷雨意者中國有聖人乎有則盍往朝之周公乃歸之於王稱先王之神致以薦於宗廟周德既衰於是稍絕及楚子稱霸朝貢百越秦并天下威

服蠻夷始開嶺外置南海桂林象郡漢興尉佗自立為南越王傳國五世至武帝元鼎五年遂滅之分置九郡交趾刺史領焉其珠崖儋耳二郡在海洲上東西千里南北五百里其渠帥貴長耳皆穿而絕之垂肩三寸武帝末珠崖太守會稽孫幸調廣幅布獻之蠻不堪役遂攻郡殺幸幸子豹率善人還復破之自領郡事討擊餘黨連年乃平豹遣使封還印綬上書言狀制詔即以豹為珠崖太守威政大行獻命歲至中國貪其珍賂漸

相侵侮故率數歲一反元帝初元三年遂罷之凡立郡六十五歲逮王莽輔政元始二年日南之南黃支國來獻犀牛凡交趾所統雖置郡縣而言語各異重譯乃通人如禽獸長幼無別項髻徒跣以布貫頭而著之後頗徒中國罪人使雜居其間乃稍知言語漸見禮化光武中興錫光為交趾任延守九真於是教其耕稼制為冠履初設媒聘始知姻娶建立學校導之禮義建武十二年九真徼外蠻里張游率種人慕化內屬封為歸漢里

君明年南越徼外蠻夷獻白雉白兔至十六年交趾女子徵側及其妹徵貳反攻郡徵側者麓泠縣雒將之女也嫁為朱戴人詩索妻甚雄勇交趾太守蘇定以法繩之側忿故反於是九真日南合浦蠻里皆應之凡略六十五城自立為王交趾刺史及諸太守僅得自守光武乃詔長沙合浦交趾具車船脩道橋通障谿儲糧穀十八年遣伏波將軍馬援樓船將軍段志發長沙桂陽零陵蒼梧兵萬餘人討之明年夏四月援破交趾斬徵側

徵貳等餘皆降散進擊九真賊都陽等破降之徒其渠帥三百餘口於零陵於是嶺表悉平肅宗元和元年日南徼外蠻夷究不事人邑豪獻生犀白雉和帝永元十二年夏四月日南象林蠻夷二千餘人寇掠百姓燔燒宮寺郡縣發兵討擊斬其渠帥餘衆乃降於是置象林將兵長史以防其患安帝永初元年九真徼外夜郎蠻夷舉土內屬開境千八百四十里元初二年蒼梧蠻夷反叛明年遂招誘鬱林合浦蠻漢數千人攻蒼梧郡鄧

太后遣侍御史任連奉詔赦之賊皆降散延光元年九
真徼外蠻貢獻內屬三年日南徼外蠻復來內屬順帝
永建六年日南徼外葉調王便遣使貢獻帝賜調便金
印紫綬永和二年日南象林徼外蠻夷區憐等數千人
攻象林縣燒城寺殺長吏交趾刺史樊演發交趾九真
二郡兵萬餘人救之兵士憚遠役遂反攻其府二郡雖
擊破反者而賊勢轉盛會侍御史賈昌使在日南即與
州郡并力討之不利遂為所攻圍歲餘而兵穀不繼帝

以為憂明年召公卿百官及四府掾屬問其方畧皆議遣大將發荆揚充豫四萬人赴之大將軍從事中郎李固駁曰若荆揚無事發之可也今二州盜賊槃結不散武陵南郡蠻夷未輯長沙桂陽數被徵發如復擾動必更生患其不可一也又充豫之人卒被徵發遠赴萬里無有還期詔書迫促必致叛亡其不可二也南州水土溫暑加有瘴氣致死亡者十必四五其不可三也遠涉萬里士卒疲勞比至嶺南不復堪鬪其不可四也軍行

三十里為程而去日南九千餘里三百日乃到計人稟
五升用米六十萬斛不計將吏驢馬之食但負甲自致
費便若此其不可五也設軍到所在死亡必衆既不足
禦敵當復更發此為刻割心腹以補四支其不可六也
九真日南相去千里發其吏民猶尚不堪何況乃苦四
州之卒以赴萬里之艱哉其不可七也前中郎將尹就
討益州叛羌益州諺曰虜來尚可尹來殺我後就徵還
以兵付刺史張喬喬因其將吏旬月之間破殄寇虜此

發將無益之效州郡可任之驗也宜更選有勇略仁惠
任將帥者以為刺史太守悉使共住交趾今日南兵單
無穀守既不足戰又不能可一切徙其吏民北依交趾
事靜之後乃命歸本還募蠻夷使自相攻轉輸金帛以
為其資有能反間致頭首者許以封侯列土之賞故并
州刺史長沙祝良性多勇決又南陽張喬前在益州有
破鹵之功皆可任用昔太宗就加魏尚為雲中守裒帝
即拜龔舍為太山太守宜即拜良等便道之官四府悉

從固議即拜祝良為九真太守張喬為交趾刺史喬至
開示尉誘並皆降散良到九真單車入賊中設方略招
以威信降者數萬人皆為良築起府寺由是嶺外復平
建康元年日南蠻夷千餘人復攻燒縣邑遂扇動九真
與相連結交趾刺史九江夏方開恩招誘賊皆降服時
梁太后臨朝美方之功遷為桂陽太守桓帝永壽三年
居風令貪暴無度縣人朱達等及蠻夷相聚攻殺縣令
衆至四五百人進攻九真太守兒式戰死詔賜錢

六十萬拜子二人為郎遣九真都尉魏朗討破之斬首二千級渠帥猶屯據日南衆轉強盛延熹三年詔復拜夏方為交趾刺史方威惠素著日南宿賊聞之二萬餘人相率詣方降靈帝建寧三年鬱林太守谷永以恩信招降烏潯人十餘萬內屬皆受冠帶開置七縣熹平二年冬十二月日南徼外國重譯貢獻光和元年交趾合浦烏潯蠻反叛招誘九真日南合數萬人攻沒郡縣四年刺史朱雋擊破之六年日南徼外國復來貢獻

南中志

常璩

咸熙元年吳交趾郡吏呂興殺太守孫靖內附魏魏拜興安南將軍時南中監軍霍弋表遣建寧爨谷為交趾太守率牙門將軍建寧董元毛炅孟幹孟通爨熊李松王素等領部曲以討之谷未至興已為功曹李統所殺泰始元年谷等徑至郡撫和初附無幾谷卒晉更用馬忠子融代谷融卒遣犍為楊稷代之加綏遠將軍又進諸牙門皆雜號將軍封吳侯交州刺史劉峻大都督修

則領軍三攻稷皆為稷所敗鬱林九真皆附稷稷表遣將軍毛炁董元等攻合浦戰於古城大破吳軍殺峻則稷因表炁為鬱林太守元為九真太守元病亡更以益州王素代之數攻交州諸郡泰始七年春吳王孫皓遣大都督薛珣交州刺史陶璜帥二十萬軍興扶嚴惡夷合十萬伐交趾稷遣炁及將軍建寧孟岳等禦之戰於封溪衆寡不敵炁等敗績僅以身還交趾固城自守破敗之後衆纔千人并新附可有四千男女萬餘口陶璜

圍之杜塞蹊徑救援不至雖班量約食猶不供繼至秋
七月城中食盡病餓死者大半交趾人廣野將軍王約
反應陶璜以梯援外吳人遂得入城得稷等皆囚之即
斬稷長史張登將軍孟通及吳并交趾人邵暉等二千
餘人受皓詔傳稷秣陵故牯稷及孟幹爨熊李松四人
於吳通四遠消息稷至合浦發病嘔血死傳首秣陵葉
其屍喪於海幹松熊至吳將加斬刑或說皓宥免幹等
可以勸邊將皓原之欲徒付臨海郡初稷等私誓不能

死節困辱虜手若蒙未死必當思求北歸稷既路死幹等恐北路轉遠以吳人愛蜀側竹弓弩言能作之皓轉付部為弓工九年幹自吳逃返洛陽松熊為皓所殺初晉武帝以稷為交州刺史大封半道稷城陷或傳降故不錄幹至表狀乃追贈交州刺史封松熊後嗣侯焉古城之戰毛晃手殺修則則子允隨陶璜璜以晃壯勇欲赦之而允必欲求殺晃晃亦不屈於璜璜怒乃裸身囚結面縛呵曰晉兵賊晃亦烈聲呵曰吳狗何等為賊吳

人生割其腹允割其肝罵曰虜腹吳罵不繼曰尚欲斬汝孫皓汝父何死狗也吳人斬之武帝聞而哀矜即詔吳子襲爵封諸子三人關内侯九真太守王素以交趾敗與董元牙門王承等欲還南中為陶璜別將衛濮所獲功曹李祚見交趾民殘害還遂率吏民保郡為晉祚舅黎晃為吳將攻伐祚不下數遣人解喻降之祚答曰舅自吳將祚自晉臣惟力是視矣邵暉子胤先為父使詣洛拜奉車都尉北還暉敗亡胤依祚固守求救南中

南中遙為之援諸姓得世有部曲弋遣之南征固以功相承也

西原蠻

宋 祁

西原蠻居廣容之南邕桂之西有甯氏者相承為豪又有黃氏居黃橙洞其隸也其地西接南詔天寶初黃氏強與韋氏周氏儂氏相脣齒為寇害據十餘州韋氏周氏恥不肯附黃氏攻之逐於海濱至德初首領黃乾曜真崇鬱為陸州武陽朱蘭洞蠻皆叛推武承斐韋敬簡

為帥僭號中越王廖殿為桂南王莫淳為拓南王相支
為南越王梁奉為鎮南王羅誠為戎城王莫浚為南海
王合衆二十萬綿地數千里署置官吏攻桂管十八州
所至焚廬舍掠士女更四歲不能平乾元初遣中使慰
曉諸首領賜詔書赦其罪約降於是西原環古尋州首
領方子彈甘令暉羅承韋張九解宋原五百餘人請出
兵討承斐等歲中戰二百斬黃乾曜真崇鬱廖殿莫淳
梁奉羅誠莫浚七人承斐等以餘衆面縛詣桂州降盡

釋其縛差賜布帛縱之其種落張侯夏永與夷獠梁崇
牽單問及西原酋長吳功曹復合兵內寇陷道州據城
五十餘日桂管經略使邢濟擊平之執吳功曹等餘衆
復圍道州刺史元結固守不能下進攻永州邵州留
數日而去湖南團練使辛京杲遣將王國良戍武岡嫉
京杲貪暴亦叛有衆千人侵掠州縣發使招之且服且
叛建中元年城澉州以斷西原國良乃降貞元十年黃
洞首領黃少卿者攻邕管圍經略使孫公器請發嶺南

兵窮討之德宗不許命中人招論不從俄陷欽橫潯貴
四州少卿子昌沔趨勇前後陷十三州氣益振乃以唐
州刺史陽旻為容管招討經略使引師掩賊一日六七
戰皆破之侵地悉復元和初邕州擒其別帥黃承慶明
年少卿等歸款拜歸順州刺史弟少高為有州刺史未
幾復叛又有黃少度黃昌驩二部陷賓蠻二州據之十
一年攻欽橫二州邕管經略使韋悅破走之取賓蠻二
州是歲復屠巖州桂管觀察使裴行立輕其軍弱首請

發兵盡誅叛者微幸有功憲宗許之行立兵出擊彌更二歲妄奏斬獲二萬罔天子為解自是邕容兩道殺傷疫疫死者十八以上調費鬪亡由行立陽旻二人當時莫不咎之及安南兵亂殺都護李象古擢唐州刺史桂仲武為都護逗留不敢進貶安州刺史以行立代之尋召還卒長慶初以容管經略使留後嚴公素為經略使復上表請討黃氏兵部侍郎韓愈建言黃賊皆洞獠無城郭依山險各治生業急則屯聚畏死前日邕管經略

使德不能綏懷威不能臨制侵詐係縛以致憾恨夷性
易動而難安劫州縣復私讎貪小利不為大患自行立
陽旻建征討生事詭賞邕容兩管日以凋敝殺傷疾患
十室九空百姓怨嗟如出一口人神共嫉二將繼死今
嚴公素非撫御之才復尋往謬誠恐嶺南未有寧時昨
合邕容為一道邕與賊限一江若經略使居之兵鎮所
處物力雄完則敵人不敢輕犯容州則隔阻已甚以經
略使居之則邕州兵少情見易啓蠻心請以經略使還

邕州容置刺史便甚又比發南兵遠鄉羈旅疾疫殺傷
續添續死每發倍難若募邕容千人以給行營糧不增
而兵便習守則有威攻則有利自南討損傷嶺南人希
賊之所處洞壘荒僻假如盡殺其人得其地在國計不
為有益容貸羈縻比之禽獸來則捍禦去則不追未有
虧損朝廷願因改元大慶普赦其罪遣郎官御史以天
子意丁寧宣諭必能謹呼聽命為選材用威信者委以
經略處理得方宜無侵叛事不納初邕管既廢人不謂

宜監察御史杜周士使安南過邕州刺史李元宗白狀
周士從事五管積三十年矣亦知其不便嚴公素遣人
元宗懼引兵一百持印章依少度穆宗遣監察御史敬
僚按之僚嘗為容州從事與公素暱傳致元宗罪以母
老流驩州衆以為不直黃賊更攻邕州陷左江鎮攻欽
州陷千金鎮刺史楊嶼奔石南柵邕州刺史崔結擊破
之明年又寇欽州殺將吏是歲黃昌瓚遣其黨陳少奇
二十人歸款請降敬宗納之黃氏儂氏據州十八經略

使至遣一人詣治所稍不得意輒侵掠諸州橫州當邕江官道嶺南節度使常以兵五百戍守不能制太和中經略使董昌齡遣子蘭討平峒穴夷其種黨諸蠻畏服有違命者必嚴罰之十八州歲輸貢賦道路清平其後儂洞最強結南詔為助懿宗與南詔約和二洞數構敗之邕管節度使辛彥以從事徐雲虔使南詔結和齎美貨噉二洞首領太州刺史黃伯蘊屯洞首領儂金意員州首領儂金勒等與之通驩員州又有首領儂金澄儂

仲武與金勒襲黃洞首領黃伯善伯善伏兵灤水雞鳴
候其半濟擊殺金澄仲武唯金勒遁免復欲興兵報仇
辛讜遣人持牛酒音樂解和并遺其母衣服母賢者也
讓其子曰節度使持物與獠母非結好也以汝為吾子
前日兵敗灤水士卒略盡不自悔復欲動衆兵忿者必
敗吾將因為官老婢矣金勒感悟為罷兵

猺

范成大

猺本盤瓠之後其地山溪高深介於巴蜀湖廣間綿亘

數千里推髻跣足衣斑斕布褐名為徭而實不供征役
各自以遠近為伍以木葉覆屋種禾黍粟豆山芋雜以
為糧截竹筒而炊暇則獵食山獸以續食嶺蹬險阨負
載者悉著背上繩繫於額俛而趨俗喜讎殺猜忍輕死
又能忍飢行鬪左腰長刀右負大弩手長鎗上下山險
若飛兒始能行燒鐵石烙其跟蹠使頑木不仁故能履
棘茨根枿而不傷兒始生秤之以鐵如其重漬之毒水
兒長大煨其鋼以製刀終身用之試刀必斬牛仰刃牛

項下以肩負刀即負即殊者良刀也弩名偏架弩隨跳躍中以一足蹶張背手傳矢往往命中鎗名掉鎗長二丈餘徒以護弩不恃以取勝戰則一弩一鎗相將而前執鎗者前卻不常以衛弩執弩者口銜刀而手射人敵或冒刃逼之鎗無所施弩人釋弩取口中刀奮擊以救度險整其行列退去必有伏弩土軍弓手輩與之角技藝爭地利往往不能決勝也歲首祭盤飴雜揉魚肉酒飯於木槽扣槽羣號為禮十月朔日各以聚落祭都貝

大王男女各成列連袂相携而舞謂之踏徭意相得則男吟鳴躍之女羣負所愛去遂為夫婦不由父母其無配者俟來歲再會女三年無所向父母或欲殺之以其為人所棄云樂有鐃鼓胡盧笙竹笛之屬其合樂時衆音競鬨擊竹筩以為節團圓跳躍叫噪以相之歲暮羣操樂入省地州縣扣人門乞錢米酒炙如儻然徭之屬桂林者興安靈川臨桂義寧古縣諸邑皆迫近山徭最強者曰羅曼徭麻園徭其餘如黃沙甲石嶺屯褒

江贈脚黃村赤水藍思巾江疎江定花冷石白面黃意
大利小平灘頭丹江閃江等徭不可勝數山谷間稻田
無幾天少雨種種不收無所得食則四出犯省地求斗
升以免死久乃玩狎雖豐歲猶剽掠沿邊省民與徭犬
牙者風聲氣習及筋力技藝略相當或與通婚姻結仇
怨往往為徭鄉道而分擄獲徭既自識徑路遂數數侵
軼邊民遂不能誰何攻害田廬剽穀粟牛畜無歲無之
踉蹌篁竹飄忽往來州縣覺知則已趕入巢穴官軍不

可入但分屯路口山多蹊不可以徧防持久則勞費又
徭人常以山貨沙板滑石之屬竊與省民博鹽米山田
易旱乾若一切閉截無所得食且冒死突出為毒滋烈
沿邊省民因與交關或侵負之與締仇怨則又私出相
讎殺余既得其所以然乾道九年夏遣吏經理之悉罷
官軍專用邊民籍其可用者七千餘人分為五十團立
之長副階級相制毋得與徭通為之器械教習使可捍
小寇不得報官徭犯一團諸團鳴鼓應之次告諭近徭

亦視省民相團結毋得犯法則通其博易之路不然絕之彼見邊民已結形格勢禁不可輕犯幸得通博買有鹽米之利皆驩然聽命最後擇勇敢吏將桑江歸順五十二徭頭首深入生徑羅曼等洞尤狼戾素不賓化者亦以近徭利害諭之悉從乃為置博易場二一在義寧一在融州之榮溪天子誕節首領得赴屬縣與犒宴諸徭大悅伍籍遂定保鄣隱然萬一遠徭弗率必須先破近徭近徭欲動亦須先勝邊團始能越至城郭然亦難

矣既數月諸徭團長袁臺等數十人詣經略司謁謝悉
紫袍巾裏橫挺犒以銀盃綵繩鹽酒勞遣之又各以誓
狀來其略云某等既充山職今當鈐束男姪男行持棒
女行把麻任從出入不得生事者上有太陽下有地宿
其翻背者生兒成驢生女成猪舉家滅絕不得翻面說
好背面說惡不得偷寒送暖上山同路下水同船男兒
帶刀同一邊一點一齊同殺盜賊不用此款者並依山
例山例者誅殺也蠻語鄙陋不欲沒其實略志於此余

承乏帥事二年諸徭無一迹及省地遂具以條約上聞
詔許遵守行之

蠻

南方曰蠻亦曰西南蕃今郡縣之外羈縻州洞雖故皆
蠻地猶近省民供稅役故不以蠻命之過羈縻則謂之
化外真蠻矣區落連亘湖廣接於西戎種類殊詭不可
勝計此等前世蓋嘗內附建黔南帥府於融州以統之
今融帥已罷一切化外也融在徭洞之南蕃蠻之東蕃

蠻時出州縣城郭以蜜臘草香等貿易每歲聖節亦有
出赴燕設者其稱大小張大小王龍石騰謝等謂之西
南蕃地與牂牁接人椎髻跣足或着木履衣青花斑布
以射獵讎殺為事持本牌標鎗木弩藥箭相鈔掠而峨
州以西又有羅坐夜回計利流求萬壽多嶺阿悞等蠻
謂之蠻酋酋自謂太保大抵與山獠相似但有首領耳
其人椎髻以白紙繫之云尚與諸葛武侯制服也西南
蕃俗大抵介別男夫甚剛妻女甚潔夫婦異居妻所居

深藏不見人夫過其妻挂劍於門而後入或期於深山
不棄穢其居謂否則鬼神禍之此諸蠻皆未嘗為害故
其事亦不能詳知又有漢蠻者十年前大理馬至橫山
此蠻亦附以來衣服與中國略同能通華言自云本諸
葛武侯戍兵聞其種人絕少按三國志初無留戍事唐
史有西屠夷乃馬伏波兵留不去者初止十戶隋末至
三百戶皆姓馬號馬留人與林邑分唐境疑漢蠻即此
類其南連邕州南江之外稍有名稱者羅殿自杞以國

名羅孔特磨白衣九道等以道名此皆成聚落地皆近
南詔羅在融宜之西邕之西北唐會昌中封其帥為羅
殿王世襲爵歲以馬至橫山互市亦有移至邕稱守羅
國王羅呂押馬者稱西南謝蕃知武州節度使都大照
會羅殿國文字按唐史東謝蠻居黔州西謝氏世酋長
部落尊畏之然則謝蕃蓋羅殿之巨室又知其地近牂
牁自杞本小蠻尤兇狡嗜利其賣馬於橫山少拂意即
拔刃向人亦嘗有所殺傷邕管亦殺數蠻以相當事乃

已今其國王曰阿已生三歲而立其臣阿謝柄國善撫
其衆諸蠻比多附之至有精騎萬計阿已年十七阿謝
乃歸國政阿已猶舉國以聽之諸蠻之至邕管賣馬者
風聲氣習大抵略同其人多深目長身黑面白牙以錦
纏椎髻短褐徒跣戴笠荷氊珥刷牙金環約臂背長刀
腰弩箭箠腋下佩皮篋胷至腰駢束麻索以便乘馬取
馬於羣但持長繩走前擲馬首絡之一投必中刀長三
尺甚利出自大理者尤奇性好潔數人共飯一棹中植

一七置杯水其傍少長共七而食探七於水抄飯一哺
許搏之拌令圓淨始加之七上躍以入口益不欲汚七
妨他人每飯極少飲酒亦止一杯數嚥始能盡蓋腰腹
束於繩故也食鹽礬胡椒不食彘肉食已必刷齒故常
皓然甚惡穢氣野次如有必坎而覆之邕人每以此制
其忿戾投以穢器輒躍馬驚走

獠

獠依山林而居

鄜露亦雅云深山窮谷積木以居名曰干欄

無酋長板籍蠻

之恍惚無常者也以射生食動為活蟲豸能蠕動者皆
取食無年甲姓名一村中推有勇力者曰郎火餘但稱
火歲首以土杯十二貯水隨辰位布列郎火禱焉乃集
衆往觀若寅有水而卯涸則知正月雨二月旱自以不
差諸蕃歲賣馬於官道其境必要取貨及鹽牛否則梗
馬路官亦以鹽綵和謝之其稍稍漸有名稱曰上下者
則入蠻類舊傳獠有飛頭鑿齒鼻飲白衫花面赤裋之
屬二十一種今右江西南一帶甚多殆百餘種唐房千

里異物志言獠婦生子即出夫憊臥如乳婦不謹則病其妻乃無苦唐志言飛頭獠者頭欲飛周項有痕如縷妻子共守之及夜如病頭忽亡比旦還又有烏武獠地多瘴毒中者不能飲藥故自鑿齒

西原蠻

儂智高反朝廷討平之因其疆域參唐制分析其種落大者為州小者為縣又小者為洞凡五十餘所推其長雄為首領籍其民為壯丁以藩籬內郡障防外蠻緩急

追集備禦制如官軍其首皆世襲分隸諸寨總隸於提
舉左江四寨二提舉右江四寨一提舉寨官民官也知
寨主簿各一員掌諸洞財賦左江屯永平太平右江屯
橫山掌諸洞烟火民丁以官兵盡護之大抵人物獷悍
風俗荒怪不可盡以中國教法繩治姑羈縻之而已有
知州權州監州知縣知洞皆命於安撫若監司給文帖
朱記其次有同發遣權發遣之屬謂之官典各命於其
州每村團又推一人為長謂之主戶餘民皆稱提陀猶

言百姓也洞丁有爭各訟諸酋酋不能決若酋自爭則訟諸寨或提舉又不能決訟諸邕管次至帥司而止皇祐以前知州補授不過都知兵馬使僅比徽校智高之亂洞人立功始有補班行者諸洞知州不敢坐其上視朝廷爵命尚知尊敬元豐以後漸任中州官近歲洞酋多寄籍內地納粟補授無非大小使臣或敢詣闕陳獻利害至借補閣職與帥守抗禮其為招馬官者尤與州縣相狎子弟有入邕州應舉者招致游士多設耳目州

縣文移未下已先知之輿騎居室服用皆儼公侯如安平之李栺田州之黃諧皆有強兵矣民田計口給民不得典賣惟自開荒者由已謂之祖業口分田知州別得養印田猶圭田也權州以下無印記者得蔭免田既各服屬其民又以攻剽山獠及博買嫁娶所得生口男女相配給田使耕教以武伎世世隸屬謂之家奴亦曰家丁強壯可教勒者謂之田子甲亦曰馬前牌皆青布巾跣足總謂之洞丁舊一州多不過五六百人今有以千

計者元豐中嘗籍其數十餘萬老弱不與此籍久不修矣洞丁往往勁捷能辛苦穿皮履上下山不頓其械器有桶子甲長鎗手標偏刀邊鐸牌山弩竹箭枕榔箭之屬其相讎殺彼此布陣各張兩翼以相包果人多翼長者勝無他奇民居苦茅為兩重棚謂之麻欄上以自處下畜牛豕棚工編竹為棧但有一牛皮為褥席牛豕之穢升聞棧罅習慣之亦以其地多虎狼爾不則人畜俱不安深廣民居亦多如此洞人生理尤苟簡冬編鵝毛

木綿夏緝蕉竹麻紵為衣搏飯掬水以食家具藏土窖
以備寇掠土產生金銀銅鉛絲丹砂翠羽洞綵練布茴
香草果諸藥各逐其利不困乏今黃姓尚多而儂姓絕
少蓋智高亂後儂氏善良許從國姓故今多姓趙氏舉
洞純一姓者婚姻自若酋豪或娶數妻皆曰媚娘洞官
之家婚嫁以麤豪法侈相高聘送禮儀多至千擔少亦
半之壻來就親女家於五里外結草屋百餘間與居謂
之入寮兩家各以鼓樂迎男女至寮女婢妾百餘壻僕

至數百成禮之夕兩家各盛兵為備小有言則兵刃相接成婚後婿常抽刃妻之婢妾迂意即手殺之自入寮能多殺婢妾則妻黨畏之否則謂之懦半年而後歸夫

家

赤雅云歸時盛兵陳樂馬上飛鎗走球鳴銃角伎名曰出寮舞

人遠出而歸者止於

三十里外家遣巫

赤雅云巫曰瑤貽

提竹籃迂脫歸人帖身衣

貯之籃以前導還家言為行人收魂歸也親始死被髮持餅壘慟哭水濱擲銅錢紙錢於水汲歸浴屍謂之買水否則鄰里以為不孝此州縣雖曰羈縻然皆耕作省

地歲輸稅米於官始時國家規模宏遠以民官治理之
兵官鎮壓之以諸洞財力養官軍以民丁備招集驅使
上下相維有臂指之勢洞酋雖號知州縣多服阜白布
袍類里正戶長叅寨官皆橫挺自稱某州防遏盜賊大
抵見知寨如里正之於長官奉提舉如卒伍之於主將
視邕管如朝廷望經略帥府則如神明號令風靡保障
隱然比年不然諸洞不供租賦故無糧以養提舉之兵
提舉兵力單弱故威令不行寨官非惟情不舉職且日

走洞官之門攜手為市提舉官亦不復威重與之交關
通賄其間有自愛稍欲振舉諸洞必其汙染之使以罪
去甚則酖焉原其始皆邊吏冒法徇利致然此弊固未
易悉數也故事安撫經略使初開幕府頒鹽緃徧犒首
領以公文下教謂之委曲大略使固守邊界存卹壯丁
云邕州守臣舊不輕付屯卒將五千人京師遣入作司
大兵城邊備甚飭比來邕州經費匱闕觸事廢弛但存
贏卒數百人城壁器械頽壞不修安撫都監司事體廢

弱州洞桀黠無所忌至掠省民客旅縛賣於交趾諸蠻
又招收省民不逞及配隸亡命者以益田子甲反隱然
平視安撫都監司此非持久計慶厯廣源之變為鑒豈
遠哉

南丹州蠻

南丹在宜州西境地產奇材異藥惡獸毒虺其人剽悍
以勁木為弩聚毒傳矢中人立死宜之高峰寨古觀州
也與南丹接境地勢極高南丹對境亦高二壘矢可相

及南丹日通市於高峰少不如意則怨毒思亂其酋莫氏國朝命為刺史月支鹽料及守臣供給錢百五十千比內郡自號莫大王間入宜州則禮之以列郡來已數十年矣其說以謂宜州徼外西原黃洞武陽羣小蠻即唐黃家賊之地崇建丹使控制之然莫氏家人亦時自相攻剽今刺史莫延甚逐其弟延廩而自立延廩奔朝廷謂之出宋延甚淫酷不能服其類鄰永樂州王氏與為仇歲相攻乾道丁亥與王氏戰敗告急於帥司帥司

遣官為和解永樂並卒勵有勝兵萬人志滅莫氏延甚
乃益驕不奉法至私刻經略安撫司及宜州溪洞司印
郊帥守花書行移以嚇諸蕃落己丑歲自言州去產馬
蠻不遠願與國賣馬乞於宜州置場意欲藉朝廷任使
威制永樂邊將常恭與交通至為代作奏章至闕下不
經由帥司樞密院是其說差官置司宜州余論奏宜州
密邇內地無故通道諸蠻且開邊隙不敢奉詔且自行
在所捕得常恭囚而劾奏其事朝廷大悟削籍竄之九

江永不放還外有省民冒法商販入南丹受其帖牒至內地幹事者多桂之興安人余亦物色得其渠送獄論如法南丹稍警

撫水蠻

安化州最驚悍在宜州西境官月給生料鹽以拊之猶日侵省地以耕民不敢與爭州亦不敢禁頃有凌羅二將者建炎間嘗率峒兵出勤王賊曹成入廣西建大旗購二人二人遣健兵侏儒者數十輩截髮為牧童候成

兵過自牛背嶺弩以毒矢射之中者立死成驚懼遁去
時盜滿四方廣西獨晏然者二將之力也至今南人稱
之子孫有仕於州縣者

安化州蠻

元托克托

撫水州蠻在宜州南有縣四曰撫水曰京水曰多逢曰
古勞唐隸黔南首皆蒙姓同出有上中下三房及北遐
一鎮民則有區廖潘吳四姓亦種水田採魚其保聚山
險者雖有畬田收粟甚少但以藥箭射生取鳥獸盡則

徒他處地曰帚洞五十里至前村川原稍平合五百餘家夾龍江居種稻似湖湘中有樓臺戰棚衛以竹柵即其酋所居善為箭中者信宿死得邕州藥解之即活雍熙中數寇邊境掠取民口畜產詔書招安補其酋蒙令地殿直蒙令札奉職咸平中又數為寇盜止令邊臣驅逐出境其黨狡獪者凡三十餘人宜州守將因擒送闕下上召見詰責之對曰臣等蠻貊小民為饑寒所迫耳上顧謂左右曰昨不欲盡令殺戮顧無噍類矣因釋罪

賜錦袍冠帶銀絲戒勗遣還逾年酋長蒙頂等六十五人詣闕納器甲百七十事又蒙漢誠蒙虔瑋蒙慎來朝上器甲數百及毒箭藥誓不搔邊比歲皆遣使入貢及輸兵器乃授漢誠官賜物有差既而侵軼如故大中祥符九年數寇宜融州轉運使俞獻可言知宜州董元已不善綏撫昨蠻人飢來質餽糧公縱主者剋剝概量及求入貢復驟阻其意遂使忿恚為亂詔黜元已遂遣潭州都監季守審代元已招撫羣蠻拒命侵掠不已獻可

請以本道澄海軍及募丁壯進討乃詔益以潭州兵五千人命東染院使平州刺史曹克明為宜融等州都巡檢安撫使內殿崇班王文慶閤門祗候馬玉內供奉官楊守珍等為都監上猶以蠻夷異類攻剽常理不足以勸絕又意其道險難進師第令克明獻可設方略攝其酋首索所鈔生口因而撫之克明獻可上言蠻人去冬寇天河今又鈔融州廂陽諸砦剽劫居民累旨詔諭曾不悛革臣請便宜掩擊從之克明乃與守珍領兵入樟

嶺路文慶馬玉趨宜州西路又令宜桂都巡檢程化鵬
取樟嶺牢隘路會合化鵬遇蠻於上房兩水口擊破之
文慶馬玉至如門圍為蠻所扼不能進克明守珍乃過
橫溪恩德砦召山獠嚮導開路進師蠻依篁竹間時出
戰鬪輒敗走旬餘上黃泥嶺杉木隘路谿谷險邃蠻據
要害以拒官軍自辰至午大潰其黨遂過罷苑抵帚峒
乃入中房前克明等頓兵下砦中夕羣蠻大譁譟擊鉦
鼓攻砦甚急出兵擊之殺傷頗衆因勝縱火焚其廬室

積聚自此恐懼竄入山石又緣龍江南岸而東至昏暮
過石峽隘士不並行蠻復連弩北岸克明遣猛士步涉
與關即退走砦於下房博賀村克明設伏砦外其夜蠻
衆大集遇伏發内外合擊追斬殆盡乘勝搜山悉得牛
馬享士卒克明等知其窮蹙乃曉諭恩信許以改過於
是酋帥蒙承貴等面縛詣軍門自首克明厚加犒宴且
數責之皆俯首謝罪及聞詔旨赦令弗殺莫不泣下北
望稱萬歲上以夷性無厭習知朝廷多釋其罪故急則

走歸緩則叛去切詔克明等諭以悉還所掠人口貨畜
即許要盟承貴等感悅奉詔乃軟猫血立誓自言奴山
摧倒龍江西流不敢復叛克明等師還宜州蠻人納器
甲凡五千類願遷還漢地者七百餘口詔分置廣西及
荆湘州軍給以田糧凡立功使臣將士遷補賜賚者千
八百一十六人承貴因請改州縣名以因歸順之意詔
以撫水州為安化州撫水縣為歸仁縣京水縣為長寧
縣自是間歲朝貢不復為邊患矣獻可又言殿直蒙肚

知歸化州州與撫水相接數遣其子文寶及其妻族甘堂偵軍事又其子格與官軍鬪敵悉部送赴闕文寶格甘堂並黥配登萊州寶元元年其黨復入寇融宜州至殺運糧官吏踰年乃平慶厯嘉祐中屢以方物入貢熙寧初土人羅世念等復搆亂大發兵討之明年世念等出降各拜官崇寧二年其酋蒙光有為寇未幾以三州一鎮戶口六萬一千來上乾道以後宜州蠻莫才爾等安化蠻蒙光漸等往往猖獗或討平或招降又有融州

屬蠻大丘峒首領楊光朝等至和後請內附皆納之而王祖道開邊諸蠻納土隸黔南所謂平州者初亦屬融州紹興三年廣南東西路宣諭使明橐請罷平觀二州從之觀州即南丹州

廣源州蠻

廣源州蠻在邕州鬱江之源地產黃金丹砂俗椎髻左衽輕死好亂其先首領韋黃周儂四姓相劫掠唐經略使徐申厚撫之黃氏納質而十二部二十九州蠻皆定

自交趾蠻據有安南而廣源雖號邕管羈縻州其實服役於交趾初有儂全福者知儻猶州其弟全祿知萬涯州全福妻弟儂當道知武勒州一日全福殺全祿當道併有其地交趾怒舉兵執全福及其子智聰以歸其妻阿儂本左江武勒族也轉至儻猶州全福納之全福見執阿儂嫁商人生子名智高智高生二十年殺其父商人曰天下豈有二父邪因冒儂姓與母奔雷火峒其母又嫁特磨道儂夏卿久之智高復與母出儻猶州建國

號曰大厯交趾攻拔儻猶州執智高釋其罪使知廣源
州又以雷火頻婆四峒及思閩州附益之居四年內怨
交趾襲據安德州僭稱南天國改元景瑞至是寇邕州
明年交趾發兵討之不克廣西轉運使蕭固遣邕州指
揮玠贊往刺侯而贊擅發兵攻智高為所執因問中國
虛實頗為陳大略說智高內屬乃遣贊還奉表請歲貢
方物未聽又以馴象金銀來獻朝廷以其役屬交趾拒
之後復齎金函書以請知邕州陳珙上聞不報四年四

月儂智高陷邕橫諸州遂圍廣州詔鉉轄陳曙等發兵討之先是智高屢求內附皆不得請又與交趾為讎且擅出山澤之利遂招納亡命數敝衣易穀食紿言峒中饑部落離散邕州信其微弱不設備乃與廣州進士黃瑋黃師密及其黨儂建侯儂智忠等日夜謀入寇一夕自焚巢穴紿其衆曰平生積聚今為天火所焚生計窮矣當拔邕州及廣州以自王否則兵死衆從之遂率衆五千沿鬱江東下攻邕州橫江寨遂陷邕州執知州陳

珙等兵死千餘人智高聞軍資庫得所上金吾怒謂珙曰我求一官統攝諸郡汝不以聞何也珙對嘗奏不報索奏章不獲遂扶珙出珙惶恐呼萬歲求自効不聽乃并其屬及廣西都監張立害之立臨刑大罵不為屈又欲任司戶孔宗旦以事宗旦亦不屈大罵而死於是智高即州建大南國僭號仁惠皇帝改元啟歷赦境內師密以下皆僭稱中國官名是時天下久安嶺南州縣無備一旦起倉卒不知所為守將皆棄城遁故智高所嚮

得志相繼破橫貴龔潯藤梧封康端九州宮曹覲於封
州趙師旦馬貴於康州餘殺官吏甚衆所過焚府庫進
圍廣州初智高將至守將仲簡不許民入保城中不得
入者多附智高勢益張先是魏瓘築州城鑿井畜水作
大弩為守備至是智高為雲梯土山攻城甚急又斷流
水而城堅井飲不竭弩發中輒洞潰智高力屈會知邕
州蘇緘屯兵邊渡村扼其歸路得黃師密父斬之以殉
番禺縣令蕭注募土丁及海上強壯二千餘人與智高

衆格鬪焚其戰艦轉運使王罕亦自外至益修守備智
高知不可拔圍五十七日至七月壬戌解去由清遠濟
江擁婦女作樂而行遇張忠戰於白田忠死之去攻賀
州不克夜害蔣偕於太平場九月庚申破昭州害王正
倫於館門驛州之山有數穴可容數百千人民聞兵至
走匿其中智高知之縱火皆焚死十月丁丑破賓州甲
申復據邕州日夜伐木治舟楫揚言趨廣州十二月壬
申又敗陳曙於金城驛初智高以反聞朝廷命曙就擊

之既而楊政曹脩張忠蔣偕相繼出又以余靖孫沔為
安撫使政脩聞智高至退軍避之忠偕勇而無謀皆死
智高益自恣南土騷然仁宗以為憂命狄青為宣撫使
諸將聽青節制曙恐青至有功急挑戰故敗五年正月
青及沔靖會兵賓州官軍土丁合三萬一千餘人按軍
法誅曙及指揮使素高等三十一人於坐一軍大振於
是進兵青將前陣沔將次陣以一晝夜絕崑崙關歸仁
鋪智高聞王師絕險而至出其不意率衆來拒執大盾

標鎗衣絳衣望之如火青陣少却先鋒孫節死之青起
麾番落騎兵張左右翼出其後交擊左者右右者左已
而左者復左右者復右其衆不知所為大敗走會日暮
智高復趨邕州夜焚城遁由台江口入大理國得屍五
千三百四十一築為京觀所掠生口萬餘人復其業獲
偽印九黃師密而下偽官五十七人梟其首於城上收
其馬牛金帛以鉅萬計智高自起兵幾一年暴殘一方
如行無人之境吏民不勝其毒朝廷為下赦令優除復

慰撫瘡痍百姓始得更生云先是謠言農家種糴家收已而智高叛為青破皆如其謠智高母阿儂有計謀智高攻陷城邑多用其策僭稱皇太后性慘毒嗜小兒肉每食必殺小兒智高敗走阿儂入保特磨依其夫儂夏卿收殘衆得三千餘人習騎戰復欲入寇至和初余靖督部吏黃汾黃獻珪石鑑進士吳舜舉發峒兵入特磨掩襲之獲阿儂及智高弟智光子繼宗繼封檻至京師初未殺日給飲食欲收智高或傳智高死乃悉棄市既

而西州復奏智高未死謀寇黎雅州詔本州為備御史
中丞孫行文請勅益州先事經制以安蜀人然智高卒
不出存亡亦未可知後募邊士使大理求智高重譯得
至會智高死乃函首至京師

環州蠻

環州蠻區氏州隸宜州羈縻領思恩都毫二縣有區希
範者思恩人也狡黠頗知書嘗舉進士試禮部景祐五
年與其叔正辭應募從官軍討安化州叛蠻既而希範

擊登聞鼓求錄用事下宜州而知州馮仲已言其妄編
管全州正辭亦嘗自言功不報二人皆舛望希範後輒
遁歸與正辭率其族人及白崖山酋蒙趕荔枝峒蠻謀
為亂將殺仲已且曰若得廣西一方當建為大唐國會
有日者石太清至因使之筮太清曰君貴不過封侯乃
令太清擇日殺牛建壇塲祭天神推蒙趕為帝正辭為
奉天開基建國柱王希範為神武定國令公桂州牧皆
北嚮再拜以為受天命又以區丕績為宰相餘皆偽立

名號補置四十餘人是年正月十三日率衆五百破環
州劫州印焚其積聚以環州為武城軍又破帶溪砦下
鎮寧州及普義砦有衆一千五百宜州捉賊李德用出
韓婆嶺擊卻之前後斬獲甚衆俘偏將二希範懼入保
荔枝峒間出拒官軍朝廷下詔購之獲希範正辭及趕
者人賜袍帶錢三十萬鹽千斤轉運使杜杞大引兵至
環州使攝官區騰進士曾子華宜州校吳香誘趕等出
降殺馬牛具酒給與之盟置曼陀羅花酒中飲者皆昏

醉稍呼起問勞至則摧仆後廡下比暮衆始覺驚走而門有守兵不得出悉擒之後數日又得希範等凡獲二百餘人誅七十八人餘皆配徒遂醢希範賜諸谿峒繪其五臟為圖傳於世餘黨悉平

梅山峒蠻

梅山峒蠻舊不與中國通其地東接潭南接邵其西則辰其北則鼎澧而梅山居其中開寶以來往往寇掠邊界招諭不聽太宗討平之嘉祐末湖南轉運副使范子

奇奏蠻恃險為邊患宜臣屬而郡縣之熙寧五年乃詔
章惇等招納惇遣喬執中知全州而大田諸蠻納款遂
檄諭開梅山蠻徭爭開道路以待得其地東起寧鄉縣
司徒嶺西抵邵陽白沙砦北界益陽四圭河南止湘鄉
佛子嶺籍其民得主客萬四千八百九戶萬九千八十
九丁田二十六萬四百三十六畝均定其稅築武陽開
峽二城詔以山地置新化縣并二城隸邵州


南丹州蠻

南丹州蠻亦溪峒之別種也地與宜州及西南夷接壤開寶以來酋帥莫洪普始求內附歲入貢熙寧四年洪普族人知寶隆鎮莫淮閭誘羣蠻為寇知宜州侯汀失於備禦坐免官詔諭安土厚生保境延世或尚恣於陸梁當盡勦其族類自是不復為寇洪普率其弟洪皓襲稱刺史洪皓卒長子淮勅襲父任俄為弟淮迪攻南丹州淮勅帥屬來奔真宗詔宜州賜間田資給之後淮迪老自言願傳其子世漸仁宗從之以淮迪為懷遠大將

軍致仕世漸為刺史檢校工部尚書又以故事補親黨數十人為檢校官世漸死命其子公帳襲之有世忍者亦淮邇子也初率其屬人內附治平初逃歸攻殺公帳奪其地自首請於朝廷願授刺史如其請神宗時獯賊殺人世忍執以獻大軍討安化世忍獻弓矢自言願世世為外臣脩貢不懈遷至檢校戶部尚書世忍死子公佞襲大觀元年廣西經略使王祖道以公佞沮命擒而殺之改南丹為觀州以都巡檢劉惟忠守之祥見祖道

傳公佞之死人以為冤其弟公晟結溪峒圖報復連歲
攻圍觀州惟忠中傷死繼以黃璘亦以疾告罷其後遂
棄而不守高宗謂朱勝非曰前日用事之臣貪功生事
公為欺罔其實勞民費財使遠俗不安也又用廣南經
略安撫使劉彥適言以公晟知南丹州兼溪峒都巡檢
使提舉盜賊公事紹興二十四年公晟始貢馬率諸蠻
來歸遂以延沈襲公晟職是年廣西經略安撫使呂愿
中諭降諸蠻三十一種皆為羈縻州縣云後延廩延甚

延廕相繼襲職知南丹州事嘉泰五年襲延廕職者其
子光熙也



粵西文載卷十七

欽定四庫全書

集部

粵西文載卷十八

九

詳校官庶吉士

臣瑚圖禮

主事銜

臣徐以坤

覆勘

總校官庶吉士

臣朱

麟

校對官中書

臣王

瓚

謄錄監生

臣黃奕選

謄錄貢生

臣王

官

欽定四庫全書

粵西文載卷十八

桂林府通判汪森編

志

安南志

明
蘇濬

安南即古交趾書云宅南交禮王制云南方曰蠻雕題
交趾有不火食者矣其地東距海西抵雲南老撾宣慰
司南抵占城北抵廣西思明憑祥山則勾漏佛迹江則

富良為最大其俗夷獠雜居不知禮義其性輕悍以富為雄役屬貧弱椎結剪髮文身跣足暑熱好浴於江便舟善水其產多魚鹽亦金砂珠璣玳瑁之湊也周武王時交趾南越裳氏重三譯來朝迨其衰也荒服不至秦置象郡以謫卒戍之秦末為南越王趙陀所併漢武帝元鼎五年平南越以其地為交趾九真日南三郡領縣二十有二先時粵王遣二使者治交趾九真聞漢兵至合浦籍其戶口以降即拜二使者為交趾九真太守置

交州刺史領之是時雖置郡縣而猶仍其俗不習漢文
書第羈縻耳平帝時錫光為交趾太守始導以禮義光
武中興遣使貢獻封鹽水侯而有任延者用徵辟為九
真守鑄田器教民懇闢示以嫁娶禮法於是徼外蠻夷
舉鄉華風云建武十六年交趾女子徵側徵貳反命伏
波將軍馬援討平之立銅柱為漢界一在欽州一在思
明府而日南林邑間亦有建者其詞曰銅柱折交趾滅
交人往來疊石以固之援鑿南塘通九真置望海太康

縣自是銅鼓銅馬始入中華矣永和間日南蠻為梗朝
議發荆揚諸郡兵討之中郎李固駁其不可謂宜選有
勇略仁惠任將帥者為刺史太守帝從固議即拜祝良
為九真太守張喬為交趾刺史喬至開示慰誘並皆降
散良單車入賊中設方略招以威信降者數萬人由是
嶺外復平三國間吳魏與蜀更置官吏不能相統一晉
平吳蜀始置刺史以便宜選用長吏陳隋以來改九真
為愛州日南為驩州皆設刺史又添設九德新昌諸郡

唐始分嶺南為東西二道置安南都護開元間大興文
教而九真姜公輔遂用經學起家入翰林為名宰輔交
人自是益嚮於文學矣大中時李琢為安南經略使苛
墨自私以斗鹽易一牛交人不堪命結南詔以叛攻陷
安南經畧使蔡襲死焉都護高駢復其地因以府為靜
海軍授駢節度五代間土豪互相篡奪十二州大亂部
民嘯聚有丁部領者自稱萬勝王以子璉為節度使宋
初璉遣使入貢太祖封之璉沒為大校黎桓所篡太宗

怒議興兵問罪水陸二軍分道並進前軍侯仁寶沒於賊旋議班師桓遣使貢方物謝罪因而撫焉桓倨驚宋使至受詔不拜信宿後乃張筵飲宴桓跣足持竿入水標魚每中一魚左右皆譟呼或自歌勸酒莫能曉其辭後李若拙為使稍以禮詘之真宗即位封南平王黎氏有安南自此始傳三世大校李公蘊篡黎氏自稱留後遣使奉貢上以蠻夷不足責遂用桓故事授公蘊交趾王再傳日尊僭稱帝改元神武子乾德繼之尤詩謾熙

寧間王安石謀立奇功議者以開邊中之言交夷可取
狀沈起劉彛後先經略益挑釁結禍交人遂叛分三道
入寇陷欽連又陷邕州殺守臣蘇緘屠其民五萬餘口
詔以郭逵為招討使趙高為副討之二將相左至富良
江不敢渡官軍八萬死者什六僅得四州一縣而還逵
高皆得罪乾德乞再修職貢還所奪州縣時置戍鎮守
惟瘴霧多病沒朝廷知其無用以四州一縣還之自端
拱迄嘉祐以來兩江州峒數為蠻所侵軼潛舉外鄉蘇

茂廣源甲源等處入交趾者六十二村累朝以其僻在海隅不復與較也傳十一世至昊昂無子壻陳日熹遂有其國傳子光昂元世祖既平雲南光昂上表奉貢遂封光昂為王光昂死子日烜自立世祖召入覲稱疾不朝右丞索多等收占城遣使假道不肯世祖命鎮南王托歡征之右丞索多中書李恒以兵會日烜空其國航海而遁李恒等追襲於海敗之會盛夏軍中疾作霖潦暴漲議者請班師恒弗能奪遂還蠻兵追敗後軍恒及

索多俱戰死官軍溺死者什有五六二十三年詔發江
淮蒙古雲南黎兵九萬餘人水陸並進日烜及其子復
走入海鎮南王追之海口不知其所之會張文虎等糧
船不至諸將恐糧盡師老無以支久議全師還日烜分
兵三十餘萬以遏歸師鎮南王由間道歸日烜卒子日
燭遣使來貢時復謀大舉平章博果密曰獸窮則噬勢
使之然今日燭襲位若遣一介之使諭以禍福彼能悔
過則不煩兵而下帝從之於是交趾遣昭明王詣闕謝

罪成宗即位命罷征皇慶二年交趾犯鎮安歸順二州
陷祿洞知洞焚養利州官舍民居殺掠數千人中書省
遣使詰之安南飾辭以謝因飭邊吏毋令侵越自是貢
獻不絕明太祖既集大統安南陳日煇遣使進貢封日
煇為安南國王且戒後世毋伐其國日煇卒封日煇為
王五年安南陳叔明奉表貢馴象禮部主事曾魯取其
副視之曰前王乃日煇今日叔明必有以也亟白尚書
詰之使者具言日煇為叔明逼死故託貢以覘上意上

曰島夷何狡獪如此却其貢不受七年叔明詭稱奉詔
視事且自稱年老以弟端代許之十一年端卒弟煒襲
叔明仍專國政二十一年國相黎季犛廢煒尋弑之立
叔明子日焜主國事次年又弑日焜立其幼子顯假煒
名遣人來貢二十九年思明府奏安南奪丘溫如懿慶
遠淵脫五縣上令以地還思明日焜不聽上曰蠻夷相
爭自古有之彼恃頑不服終必取禍姑待之而已三十
二年季犛復弑顯而立其幼子煖尋復弑煖奪其位季

聲詭姓名為胡一元子蒼易名奎尚偽稱日焜奉貢永樂初季聲詐稱陳氏嗣絕奎陳氏甥求署國事上不虞其詐許之踰年日焜孫天平間道由雲南走憇京師會安南賀正旦使至上出陳天平示之使者識其故王孫也皆錯愕下拜有感泣者上遣使責之黎季聲詭辭謝罪請天平還國上遣廣西都督黃中呂毅大理卿薛鼎等以兵五千人送天平還既入境季聲遣陪臣黃晦卿等迎候禮甚恭具牛酒犒師中等遣騎覘之壺漿屬路

無他也遂進度雞陵關至芹站山路險峻林莽密軍行不得成列會天雨季聲乃伏兵山谷中衆數萬鼓譟出斷橋後騎不得進遂劫天平格殺之崑亦死中等以聞上大怒決意討之命成國公朱能西平侯沐晟新城侯張輔都督柳升率裨將朱彬陳旭等分道並進尚書劉儁黃福參贊軍務會朱能疾卒以輔代之輔入安南破隘留雞陵等關沐晟率雲南兵與輔合遂自三帶州招市江口造舟以進敗賊衆於嘉林江夜入多邦城進

克東都西都聞之焚宮室倉庫以遁於是宣江洮江等
州縣皆降輔等督舟師攻賊於富良江賊以海舟橫截
江中而用刳船載木立柵以拒輔乘柵未備躬督將士
力戰賊不能支都督柳升以舟師橫擊之賊大敗乘勝
長驅得船三百艘復引兵出奇羅海口生擒賊首黎季
犛季保并其子澄及黎蒼黎芮黎澈偽柱國胡杜等安
南平先上勅張輔求陳氏子孫不可得國中官吏耆老
咸稱安南本中國地願復古郡縣齒於齊民輔以情聞

乃置交趾三司以都督呂毅黃中掌指揮使司尚書黃福兼掌布政按察司事前侍郎張顯宗為左布政使置交州北江諒江三江太原宣化建平新安建昌奉化清化鎮蠻諒山新平又安順化新華等十七府統四十七州一百五十四縣衛十所十三市舶一遴選文武諸臣守之張輔等班師各進爵級賞賚有差六年交趾餘黨簡定反上命沐晟討之晟與簡定戰於生厥河敗績都督呂毅尚書劉儵參政劉昱都指揮柳琮皆沒上復命

張輔往征時賊黨阮師等推簡定為偽上皇別立陳季
擴為偽皇輔進兵慈廉州攻喝門江粉社營柵皆破之
獲賊首簡定檻送至京伏誅八年陳季擴請降上以為
交趾布政使九年張輔奏反賊陳季擴外示順服中實
詭詐終無悛心請討之十年輔遣都指揮師佑獲陳季
擴於老撾賊黨皆平十五年召輔還京命李彬鎮交趾
御史黃宗載言交趾新入版圖勞來尤在得人今府州
縣多歲貢生乞仕遠方遂授以職既乏太學教養之素

又非諸司歷試之才以故牧民者不知撫字理刑者不諳法律宜令御史二司嚴覆上狀黜陟從之十六年季擴餘黨黎利等復叛先是上因給事中馮貴奏賦安南金珠命中官馬騏鎮守擢貴叅政時官吏貪夷財物人不勝徵求靡有固志馬騏尤為不法土官州縣不勝其毒反者四起而黎利尤劇馮貴有土兵二千人驍勇善戰馬騏嫉之盡奪其兵貴與叅政侯保俱力戰死李彬分兵勦捕時有擒獲然反者愈多終不能制也亡何彬

卒利賊益張都督方政敗績指揮伍雲陳忠俱死之仁
廟初即位遣中官山壽諭黎利授以清化知府命都督
方政榮昌伯陳智鎮守交趾利不受職日肆侵掠智政
素不相能山壽擁兵觀望宣廟元年智等進兵至茶籠
州敗績知府岑彭死之上命成山侯王通都督馬瑛往
征交趾尚書陳洽參贊軍務至寧橋遇伏軍遂敗陳洽
死之指揮李騰等俱陷於賊通奏賊猖獗復命安遠侯
柳升保定伯梁銘都督崔聚由廣西黔國公沐晟興安

伯徐亨新寧伯譚忠由雲南會兵討賊命尚書李慶參
贊軍務黃福仍掌交趾二司事二年黎利陷昌江城都
指揮李任指揮顧福劉順知府劉子輔中官馮智死之
利攻交趾城通等歛兵不出利致書與通請和通自寧
橋之敗氣大沮喪遂許以清化等州地按察使楊時習
曰奉命討賊乃與賊和而擅棄地旋師何以逃罪通厲
聲叱曰非常之事惟非常之人能之汝何所知自是人
無敢言九月柳升師至隘留關利及大小頭目具書遣

人詣軍門乞罷兵息民立陳氏後升等受書不啟封遣人奏聞時賊於官軍所經處列柵拒守官軍連破之直抵鎮夷關升意易之不嚴戒備至倒馬坡獨與百數十騎先馳所履皆淖泥地賊伏兵四起升中鏢死從升者皆沒是日梁銘李慶相繼病死都督崔聚率官軍進至昌江遇賊敗績聚為賊所殺官軍或死或奔竟無降者利益侵我內地祿州西平州及欽州四峒皆沒於安南通與聯盟遂宴利遺以金織文綺利亦奉重寶為謝是

月利遣人至京表以陳暉為名實出利上集大臣議之
張輔等謂太宗經略數年得此土今棄之無名徒示弱
耳上問楊士奇士奇曰求立陳氏後者太宗初心也求
之不得乃郡縣其地今陳氏既有後封而嗣之何謂無
名楊榮亦曰永樂中費數萬命得此無益國家今勞者
未息困者未甦更發兵不可上曰爾兩人正合吾意皇
祖言吾亦聞之乃出暉表示羣臣諭罷兵意通馳奏暉
獻叛人蔡福等遂班師時文武臣多不能返惟尚書黃

福自交趾回為關戍所獲守關者羅拜曰公文民父母也利聞之曰朝廷遣治交趾使人人如黃尚書皆按兵不復興矣遣人馳往守護送至龍州三年通等至京下廷鞠言通等失律喪師山壽縱賊馬騏激變藩方論死餘坐罪有差贈交趾死節諸臣武官世襲文官復其家誅叛臣蔡福等籍其家遂大赦交趾令具陳氏嫡孫之實以聞利遣人奉表奏陳嵩病死國人推利守國以俟朝命上命再求陳氏子孫利再疏稱陳氏無後上屢降

勅責之六年利遣人貢方物并上國人奏言陳氏果絕
利撫綏有方得民心乞令管攝永為藩臣詔利權署國
事八年利死子麟襲自黎氏據安南雲南鎮遠州復為
所侵欽州貼浪如昔二都亦入安南朝廷置不問正統
元年麟遣陪臣來賀封麟為安南國王并賜印四年安
南寇掠安平州思陵州竊據二峒二十一村上遣官諭
之麟乃謝罪悉行退還七年麟死子濬襲天順三年濬
為庶兄宜民所弑國人討平之四年濬弟灝襲弘治中

灝死子暉襲暉死子敬自立未及請封而死以敬弟誼襲正德初安南臣阮种弒誼立其弟阮伯勝國人黎廣等討平之以灝庶子調襲時安南謀蠶食占城占城上聞諭禁之輒陽聽命侵盜如故已而中國人多潛入安南至有受偽御史者教之窺伺雲南太監錢能貪殘今指揮郭景往來安南猾夷奸闌出入莫敢誰何遂誘我遁逃覘我虛實鎮南關外類多華人而臨安諸郡所在有夷賊矣於是撫臣屢請增文武吏士控制彈壓然交

人侵奪我州里我亦不能禁時凋弱懦羣小下專權虐政暴征國人怨之十一年社堂燒香官陳暲作亂弑暲詭為陳氏後首目莫登庸者故有勇力暲以為都力士亦叛降暲尋復與黎氏大臣阮弘裕等共立黎譔為主而攻敗陳暲時譔方十歲兵柄在登庸掌握黎氏臣鄭綏以登庸不臣譔擁虛位仍復立其族子酉榜為主登庸攻敗鄭綏捕酉榜殺之十六年登庸率兵攻陳暲暲敗死嘉靖元年勅編修孫承恩等齋詔往諭即位登庸

自稱安興王謀弑諲諲走清華登庸立諲庶弟慮為王國亂道梗承恩等不能達三年登庸冒諲名遣人進貢并求封四年黎諲遣人請兵救援俱不能通五年登庸賂欽州判官唐清為慮求封都御史張嶺置於獄六年登庸復使國人范嘉謨偽作慮禪位詔遂篡之立子方瀛為偽太子尋弑慮九年登庸禪位於方瀛自稱太上皇退居都齋海陽為方瀛外援擅作大誥五十九條秋黎諲卒於清華鄭江黎炯等共立黎寧為嗣十五年黎

寧差頭目鄭惟僚泛海至京歷奏登庸僭逆之罪是年以皇子生先議頒詔諸夷禮部尚書夏言奏安南不貢逾二十年宜罷使上命兩廣督臣潘旦覈其罪狀及寧奏至遂下廷議禮兵尚書嚴嵩張瓚等會府部多官議興兵致討命工部尚書毛伯溫為兵部尚書從宜撫剿兩廣侍郎潘旦疏稱莫氏奸雄之賊黎氏逆利之裔皆非所宜立如以夷狄處之則元昊可爵不義可侯而黎利可王也二氏紛爭兵甲未息皆欲假天朝名號以為

之主只宜靜以觀其變與廷議不合因召旦還以侍郎
蔡經代之是時欽州知州林希元奏交人侵欽州如昔
貼浪二都漸凜金勒古森了葛四洞宜問罪而廉州守
張岳獨言用兵之害宜留使者勿前督府蔡經問岳曰
空言罷兵亡以塞明詔子能保毋用兵降登庸乎岳曰
欲降之必令納地令貶號且令匍匐詣闕獻國中圖籍
聽上處分夫國體固不可褻也督府曰如此能令登庸
聽乎岳曰祇岳一檄之力足矣於是督府以兵事調度

一屬之岳而岳具有成畫司馬毛伯溫至岳以先所論
列者告之復手賊情地形冊子授伯溫曰公計用兵則
圖進取方略無逾此者然不若罷兵毋征為完計也顧
公策安決耳連數日語輒當伯溫意伯溫密謂岳曰交
事屬子矣先是登庸聞廷議興師遣人上表乞降未幾
方瀛死以福海嗣之登庸密遣使輸情於岳岳絕不與
通至是求益懇岳用前言於督府者要之登庸初猶倨
驚岳懼以禍令蚤自為計於是登庸惟命會岳遷浙江

督學尋轉參政登庸復首鼠兩端伯溫經奏乞還岳廣
東登庸密覘曰廉州守安在岳至登庸曰張太守在吾
無恐矣伯溫檄重兵駐節南寧而參政翁萬達者素負
雄略諸所策如張岳議伯溫益信之萬達使指揮王良
輔通判蘇廷獻傳譯令束身軍門歸地繳印去僭號奉
正朔遣良輔等作書諭之登庸乃以十一月素衣繫組
躬率頭目耆士人等各以尺帛束頸候於南關萬達等
先於關內近地開張幕府設龍亭覆以黃幄傳令開關

登庸暨其姪莫文明并頭目人等由關道左出脫履跣
足面北而跪傳解其組及接受降書遣指揮王良輔馳
送莫文明等赴京奏曰安南自漢晉雖稱內附然夷俗
瘴鄉終不宜中國大率數歲一亂又必數歲而後定昔
張輔以十餘年勞費僅得數年郡縣叛者相繼卒歸於
夷此明驗也參酌前世利害莫若外而不內如以登庸
有罪未宜輕授爵土伊孫福海見今待命倘蒙矜宥或
可別與都護總管等項名色如漢唐故事此所謂以夷

治夷者也至若黎寧雖稱為黎氏子孫節據諸司查勘
或以為阮淦子或以為鄭氏詐俱難憑據但黎氏修貢
已久若遺裔尚存似宜體恤合行雲南撫鎮官查勘果
有可據仍令於漆馬江居住不致失所如此處分庶為
曲盡登庸亦上表謝罪願以如昔貼浪二都漸凜金勒
古森了葛四峒歸之欽州如林希元議上從之乃降安
南國為安南都統使司以莫登庸為安南都統使改海
陽山南等十三路各設宣撫使司盡取欽州侵地仍令

守臣勘訪黎寧果係黎氏後授以境土以承宗祀制下
登庸已死伯溫等請以制命授其孫福海從之乃以二
十年班師各陞賞有差二十五年莫福海卒子宏漢方
五歲國內多亂又五年始襲時黎氏雖居一隅而黨類
實繁黎寧死其臣鄭檢立其子黎寵寵死復立其宗人
維邦會莫臣黎伯驪亂檢以兵會之宏漢奔海陽自是
不能赴闕領職而貢使亦不能行矣四十三年莫宏漢
卒萬厯元年子莫茂洽襲自嘉靖四十二年入貢迄十

餘年方以期修貢蓋邦內多梗也其後黎維邦死鄭檢
子松立維邦之子維潭襲以師攻殺茂洽輔黎氏據安
南莫氏越在草莽僅數十人或竄欽州或竄思明未有
振者黎氏叩關求款聽天朝處分然黎惟潭真否論者
不一上命覈實以聞

瞿九思莫茂
洽傳附後

莫茂洽者宏渙嫡子也嘉靖四十三年宏渙以正月二
十七日卒於是茂洽使龍憑指揮盧堂告訃於左右江
僉事徐浦因以請襲於是吳司馬下所司驗問明年冬

僉事章汝槐得茂洽實宏瀨正室裴氏所生於嘉靖四十二年二月十二日今五歲矣為嫡長子當襲而庶子莫演瀨差居長屬婢妾武氏出乃趨召世父莫敦讓及宣撫阿富春等赴闕果無異狀先是黎伯驪之變自三十六年及三十九年四十二年四十五年朝貢後先並未至至是茂洽請修舉前貢儀部乃視宏瀨例宏瀨二十七年當入貢會未除官誠監門弗得通其後得襲都統使始以貢入今請襲茂洽官然後謝恩修貢如故約

於是授茂洽都統使是歲萬厯元年也故事安南先國王時天王即位遣使齎詔至國王即備儀差遣陪臣赴闕朝賀茂洽乃循國故實敬預備賀儀欲隨貢以進於是憑祥指揮鹿鳴周請於分守使高則益分巡使高克謙因制置使殷正茂以聞上可之其後辛巳復使使者梁逢辰貢金瓶香爐諸物先是嘉靖中罷安南諸貢使宴至是始命宴之已使通事范可久送逢辰行至憑祥州土吏李德勝索使使者橐中裝不得因阻驛騎馬低

徊者五月出關乃佐土酋陸珠等奪一介行李遂歐可
久及潘應科科傷面貌久之死於是制置使陳瑞御史
馬呈圖後先劾奏之而給諫張鼎思亦上書大略以為
粵西諸土吏獨養利南丹向武諸州奉約束惟謹他一
切驚驚不服漢使每至其地往往毒而殺之大不敬請
比陳瑞滅大王州郭應聘滅永安永寧州近事如法事
下大司馬皆輕重罰治是時茂洽乃狡焉思啟封疆矣
始下琅州西伴上琅州東伴地接下雷峒上琅州中西

伴下琅州全伴地接歸順州久為二峒州所侵茂洽乃
因貢使以請於是都御史吳文華屬同知南寧府周易
驗問盡給安南二峒州不從下太平理葉蒸柳州理李
遠覆案之於是巖以內村鄧蕩柯巧供龍蒲通蓬吟邦
屬下雷巖以內村獨洗雅江丘屬安南至芭丹十一村
泡泉六社以江為限上下傍伏良亂屬下雷江以西村
那哀野斷其郡音屬安南江以北村莽排岷米喉龍那
馬弄龍告蒙多泥邕替那弄泮漕邕嵩邕客凌浪邕丹

芭河芭空屬歸順江以南村札義多邊芭啼打落箇定
屬安南他若祿架祿郡孤古沱泓芭米屬歸順茶嶺那
造郎寧拔立弄隘六甲內光外光上坤哋定四甲屬安
南安南不從以為臣所使使者阮洛案驗上琅州芭丹
之北實下雷所占鄔巷等二社大率二十村上琅州泡
泉江之北實歸順所占上轄等九社大率一百四十六
村石林州茶領以北亦歸順所占茶嶺莊及清朗等四
社大率九十五村至全滕虎耽二所臣先國故基猶存

前是高平撫治使黎如磬聞漢使至躬率疆吏治厨傳
為下雷許宗蔭襲殺甚多皆有狀事下戎部亡何給諫
王致祥上書簿責茂洽大略以為茂洽所請地失於數
十年之前而爭於數十年之後此或假以出方物取價
沃壤內原其封殖而外固其藩籬未可知也於是大司
馬張佳胤移粵西都御史吳善善乃屬左右江兵巡使
陳誥郭裴即訊是日南寧理萬煜慶遠理王體昇乘傳
後先馳下雷至歸順而下雷土吏許宗蔭歸順土吏岑

瑾及安南使者甲澂並以狀來請謁安南竟牢執初約
乃請漢官觀察民風當是時吟邦龍蒲人民皆披髮跣
足長衣大袖猶有夷風竟與安南而歸順祿架祿郡沱
泓三村又皆束髮短衣實漢人毋割割芭米孤古二村
與安南安南大率得村凡一百二十六大司馬張佳胤
以為制置使議是書奏上乃詔曰朝廷優待遠人已曲
從所請今後再不許越分陳乞是歲丙戌也其後清華
道人鄭檢自稱黎氏後引兵侵茂洽亡何檢物故子松

乃以十一月朔入城逼茂洽茂洽犇於是莫敬邦提兵
十萬人鏖松戰而以世父莫敦讓告急於上因引孫一
人弟九人族屬五十人直走永安願借欽州一撮土母
為鄭松所魚肉也是時朝鮮亦乞兵御史徐元正上書
以為朝鮮與安南殊科朝鮮中國之門戶勢且當援今
安南遠在萬里之外亦請比以援之此於策不便且欽
州實雷廉門戶珠池在焉有如一日不可知則百粵五
嶺豈得高枕而卧乎事皆下大司馬石星大司馬以御

史議趣制置使諭莫敦讓還歸故國上詔制置使相機處置務求安妥是歲癸巳也安南東西可一千七百六十里南北可二千八百里永樂初大將軍張輔奏舉懷才抱德明經能文博學有才聰明正直孝弟力田賢良方正練達吏事明習兵法者凡九千人前是丁丑秋八月土人陳一熊上書請學世業始未嘗不斌斌禮讓而後漸習篡弒也

粵西文載卷十八